



博物志

三

三
九八

服部文庫
117
84
3



續博物志卷第一



前都官員外郎隴西李石撰

張華述地理自以禹所未志且天官所遺多矣經所不載以天包地象緯之學亦華所甚惜也雖然華做山海經而作故略或曰武帝以華志繁俾芟而略之余所志視華歲時綿歷其有取於天而首以冠其篇次第做華說一事續一事不苟於搜索與世之類書者小異而比華所志加詳爾雅既曰釋天不得不略言其趣凡有六等一

曰盖天文見周髀如盖在上二曰渾天形如彈丸地在其中天包其外猶如雞卵白之繞黃楊雄桓譚張衡蔡邕陸績王肅鄭玄之徒並所依用三曰宣夜舊說云殷代之制四曰昕天昕讀為軒言天北高南下若車之軒吳時姚信所說五曰穹天云穹隆在上虞氏所說六曰安天晉時虞喜所論鄭注考靈曜云天者純陽清明無形聖人則之制璿璣玉衡以度其象如鄭此言則天是太虛本無形體但指諸星運轉以為天耳

天圍園三百六十五度四分度之一案考靈曜云一度二十九百三十二里千四百六十一分里之三百四十八周天百七萬一千里者是天圓周之里數也以圍三徑一言之則直徑三十五萬七千里此為二十八宿周迴直徑之數也然二十八宿之外上下東西各有萬五千里是為四遊之極謂之四表四表之內并星宿內摠有三十八萬七千里然則天之中央上下正半之處則一十九萬三千五百里地在於中是地去天之數也

凡有九道故考靈曜云萬世不失九道鄭注引
河圖帝覽嬉云黃道一青道二出黃道東赤
道二出黃道南白道二出黃道西黑道二出
黃道北月春東從青道夏南從赤道秋西從
白道冬北從黑道

律歷志云角一十二度亢九氏十五房五心五
尾十八箕十一斗二十六牛八女十二虛十
危十七營室十六壁九奎十六婁十二胃十
四昴十一畢十六觜二參九井三十二鬼四
柳十五星七張十八翼十八軫十七此三百

五度二十八宿之度也

丑為星紀初斗十二度終於婺女七度子為玄
枵初婺女八度終於危十五度亥為娵觜初
危十六度終於奎四度戌為降婁初奎五度
終於胃六度酉為大梁初胃七度終於畢十
一度申為實沈初畢十二度終於井十五度
未為鶉首初井十六度終於柳八度午為鶉
火初柳九度終於張十七度巳為鶉尾初張
十八度終於軫十度辰為壽星初軫十二
度終於氏四度卯為大火初氏五度終於尾

九度寅為析木初尾十度終於斗十一度
漢律歷志以前歷上元泰初四千六百二十七
歲至元封七年復得闕逢攝提格之歲中冬
孟康曰言復得者上元泰初時亦是闕逢之
歲歲在甲曰闕逢在寅曰攝提格此謂甲寅
之歲也然則乙卯曰旃蒙單閼丙辰曰柔兆
執徐丁巳曰強圉大荒落戊午曰著雍敦牂
己未曰屠維協洽庚申曰上章泥灘辛酉曰
重光作噩壬戌曰玄默闔茂癸亥曰昭陽大
淵猷甲子曰闕逢困敦乙丑之歲曰旃蒙赤

奮若

正月得甲則曰畢陬二月得乙則曰橘如三月
得丙則曰修病四月得丁則曰圍余五月得
戊則曰厲臬六月得己則曰則且七月得庚則
曰室相八月得辛則曰塞牀九月得壬則曰
終亥十月得癸則曰極陽十一月得甲則曰
畢辜十二月得乙則曰橘涂
介分二十八宿為十二次晉灼曰大歲在四仲
則歲行三宿太歲在四孟四季則歲行二宿
二十八宿三十四宿而二十八宿十二歲

而周天是歲星年行一次也

山海東荒經云太荒之中有山名曰太言日月所出有波谷山者有大人之國又云太荒之中有山名曰合虛日月所出有中容之國河圖括地象云二儀氣分伏者為天偃者為地物理論云水土之氣升為天

廣雅云東方蒼天東南陽天南方炎天西南朱天西方成天西北幽天北方玄天東北變天中央鈞天

五經通義云天神之大者曰昊天上帝其佐曰

五帝淮南子云日出暘谷浴於咸池拂于扶桑是謂晨明登于扶桑是謂朏黯明至于曲阿是謂朝明臨于曾泉是謂早食次于桑野是謂晏食臻于衡陽是謂禺中對于昆吾是謂正中靡于鳥次西南是謂小遷至于悲谷是謂晡時回于女紀是謂太遷經于泉隅是謂高春頓于連鑿石是謂下春爰息六螭是謂懸車薄於虞泉是謂黃昏淪于蒙谷是謂定昏日入崦嵫崦嵫山落棠經細柳入虞泉之地蒙谷之浦垂晷在樹端謂之桑榆

呂氏春秋曰白人_之南_建木_之下日中無影蓋
天地之中也

漢書云月_立夏_{夏至}行_{南方}赤道曰_南陸_立秋
秋_{分行}西方_{白道}曰_西陸_立冬_{冬至}行_{北方}
曰_北陸_分則_{同道}至_則相_過晦_而見_{西方}謂_之
之_朏朔_而見_{東方}謂_之朏_亦謂_之側_匿朏_健
行_胸縮_遲

周官天星皆有分野角亢氐兗州房心豫州尾
箕幽州斗女揚州虛危青州室東壁并州奎
婁胃徐州昂畢箕州觜螭參益州東井輿鬼

雍州柳星張三河翼軫荊州

鄭司農云保章氏五雲之物一至二分觀雲色
青蟲白喪赤兵荒黑水黃豐東方朔別傳云
凡占東畔當視天有黃雲來如覆車五穀大
熟青致兵白致盜烏黑多水赤火

京房風雨占候曰黑雲如一疋包二日中一日
大雨二疋五日雨三疋十日雨

易緯曰八節之風謂之八風呂氏春秋云東北
曰焱風亦曰靄風東曰滔風東南曰薰風南
曰巨風西曰颯風西北曰厲風北方曰寒風

王充論衡曰圖畫之工圖雷之狀如連鼓形又
圖一人若力士謂之雷公使左手引連鼓右
手推之春秋震夷伯之廟謂劈歷破之是也
霹靂俗字也

梁太后信兄冀誅杜喬李固雷震憲陵寢室
太平之時十日一雨一歲三十六雨

晉中興書曰甘露降者老得敬則松柏受之尊
賢容衆則竹箨受之一日天酒虹依雲陰而
晝見於日衝無雲不見太陰亦不見
炎帝赤精之君火官之臣火庭氏也

明皇在長安詔一行鑄渾儀及太衍曆先是漢
洛下閎云此曆後一千年差一日有聖人出
而正之至是果一千年因以一行為聖人僧
一行本名遂俗姓張氏後出家改名敬賢遷
化詔起塔銅人原謚大惠禪師并御製碑八
分書

二十八宿為其有二十八星當度故立以為宿
推測者多變如畢有十七度半觜半度星既
不當度自不當用為宿星度皆以赤道為法
黃道則有斜有直與赤道不等

劉知幾曰兩曜日星職於天象非如九州萬國廢置無常故海由可變而景緯無易必欲刊之國史施於何代不可也史記書有天官讀者竟忘其誤班固天文志非漢事而隸入漢書已乖越矣且如熒惑退舍宋公延中台告圻晉相速福星集潁川而賢人聚月犯少微而處士亡如斯之類志之可也若乃體分濛頰色著青蒼丹犧素魄之躔次黃道紫宮之分野既不預於人事乃編之於策書又曰天文有志何不為人形志乎

太歲在丑乞漿得酒太歲在巳敗妻鬻子藕生應月閏月益一節芋以十二子為衛亦應月之數也

俗以五月雨為分龍雨一日隔轍雨

雲五色為慶三色為商或曰外赤內青為商楊

雄曰紫蜺商雲明圍日君子小人並進也

郭璞曰逢飛磴則天風春則天雨逢蠓也傳曰

雷不蓋醬令人腹中雷鳴月上下弦之時觸

醬輒壞里俗忘之

自古帝王五運之次有二說鄒衍以五行相勝

復物卷一
為義劉向則以相生為義漢魏共尊劉說
關東西風則晴東風則雨關西西風則雨東風
則晴陽之專氣為電陰之專氣為霰
中國有洞天三十六所皆謂之天第一王屋山
洞天周回萬里名小有清虛天其次委羽山
洞天周回萬里名大高空明天其次大玄摠
真天其次三玄極真天其次寶仙九室天其
次上玉清平天其次涿明耀真天其次金坛
華陽天其次左神幽虛天其次成德隱玄天皆
仙人所居也

木與禾相摩則發金與火相守則流陰陽錯行
則天地大統於是乎有雷有霆水中有火及
焚大槐人間往往見細石形如小斧謂之霹
靂斧或謂云霹靂櫻案玄中記云玉門之西
有國山山上有廟國人歲歲出磧數千名霹
靂磧給霹靂用後春至秋乃罷禮記有離金
鑽牛骨鑽鑽與磧同音祖舍切
京房易傳曰四方常有火雲五色具而不雨下
有賢人隱狔將風則躡鼉欲雨則鳴
漢博士劉熙曰豫司充箕以舌腹言之天顯也

白蟻聞竹雞之聲化為水竹雞自呼泥滑滑是也或曰白雞之雄亦能化白蟻
鶴性甘帶每遇巨石知有蛇即如術士禹步其石防然而轉南方學其法伺其養雛緣木以
篋緝縛其巢鶴必作法解之乃於木下鋪沙印其足迹而做之
暮鳩鳴即小雨朝鳶鳴即大風
物有異體而相制者翡翠屑金人氣粉犀北人以針敲冰南人以線解茶
高誘注淮南子云方諸大蛤也熟摩拭令熱以

向月則水生許慎說文曰諸珠也方石也有一國王小夫人生一肉團大夫人妬之作木函棄之常河水後河邊人得之肉破生千小兒勇健欲伐父王國小夫人以乳五百道射小兒口遂弛弓伏號為賢劫千佛
帝嘗有四妃一生帝摯一生帝堯一生商之先
一生周之先商後封于宋都商丘
今上於前朝作鎮睢陽洎開國號大宋又建都在大火之下
宋為火正按天文心星為帝王實宋分野天地

人之冥契自古罕有

孔子生於魯襄公二十二年

老君其母曾見日精下落如流星飛入口中中有娠

七十二歲而生於陳國渦水李樹下剖左腋

而生長一十二尺

佛者本號釋迦文即天竺釋迦衛國王之太子於

四月八日夜從母右脇而生有三十二相當

周莊王九年魯莊公七年夏四月常星不見

夜明是也

龜脂得火可以燃鐵

佛以三月十五日夜出家二十九出家三十五

得道

寧國論云蜀中本無獠獠為德陽山谷洞中壤

壤而出轉轉漸大自為夫婦而益多夫土乾

則生蚤地濕則生蚊積穀則生蠹腐肉則生

蛆蛆化為蠅蠅又自生蛆蛆又生蠅豈有窮

乎

日月蝕而私者生兒則多疾日月晦朔弦望而

私者生兒則愚癡瘖瘂鈞絞了戾逐陣而私

者生兒多凶暴無禮亦猶木且造麴而酸水

日造醬則生蟲九焦日種穀則不生牙六合
日遣鬼鬼不去火日安蜂則蜜苦土日種麻
則不生

麀尾能留紅掃氈氈不蠹

馳糞煙殺蚊壁虱

李衛公言鵝驚鬼鷄鵲戢火孔雀辟惡

水母生兒無目龜鼈生兒無耳

桐廬人嘗伐竹遺竹見一宿竿雉頭蛇身猶未

變乃知竹為蛇蛇為雉蛇為雉頭先化曾於

青城山小路上見之

鶴所以壽者無死氣於中也

闡水東北有石室室中若有積卷因謂之積書

巖每見神人往還世人不悟其為仙者又謂

之神鬼彼差目鬼曰唐述因名其山曰唐述

山堂曰唐述窟道術之士多往棲焉

巫咸山在安縣東南巫咸右手操首蛇左手操

赤蛇群巫所役上下大荒西經曰巫咸即巫

盼巫彭巫姑巫真巫孔巫抵巫謝巫羅

先提山有鈎蛇長七八丈尾末有歧蛇在山澗

水中以尾鈎岸上人牛食之水傍瘴氣特惡

氣中有物不見其形其作有聲中木則折中
久則害名只鬼彈郡有罪人從之禁防不過
十日死也

真菊可以延齡野菊可以鴻久張華云黃精益
壽鈞吻殺人是矣

子程子曰昔洛陽北部有母既生子病不能自
舉乳求他婦負哺之子嬰及孩母疾不問子
長不識所育負哺者盜其愛二母忿鬪于庭
子佑負哺者而反踈其生母

有人為山魘所祟或教以爆竹如除夕可彈人

用其言獲安問之則曰此荆楚歲時記以辟
山魘鬼陰冷之氣勝則聲陽以攻之

蓬蒿者其狀如蓬枝多葉少根如絲葉如扇不
稱自動風生主庖廚清涼驅殺蟲蠅以助供
養堯時生於庖廚為帝王去惡孫柔王克白
虎皆云太平時蓬生於庖廚中煖一炬火爨
一鑊水終日不能熱倚一尺冰置之熱厨終
夜不能寒

師曠奏清角有鶴集廊門延頸而鳴飾翼而舞
今世有馴養之鶴聞歌曲拊掌而舞者習之

也

正月上辰出此水邊鹽濯食蓬餌以被邪漢儀也
雛鳥形類鴉鳥純黑而背紅亦曰阿雛鳥為鴉
反哺為慈鳥腹下白不亦反哺為鴉鳥白頭
群飛為鷺鳥大而白頭為倉鳥卑居為楚鳥
又鴉鳥為賈鳥莊子曰鴉賈也
胡家說人臣得龍之一體當至三公相曾公亮得
龍之脊王安石得龍之睛
魚勞則尾赤人勞則髮白
鱸黃魚口在頰下無鱗長鼻軟骨俗謂玉板長

二三丈江東呼為黃魚

網魚得鱗不如啖茹

南越志曰烏劍懷墨而知禮江東人或取其墨
書契以給人物書迹如淡墨逾年墨消空紙
耳

抱朴子蟾蜍壽至千歲者頭上有角頰下有丹
書八字

裴頠崇有論曰鳥無胃肺蛤蜊無臟蛭以空中
而生蠶以無胃而育

聒抱者鴝鵒鸛也影抱者龜鼈龜也

視鵝制施觀魚制帆
神和子姓屈突名無為字無不為張詠布衣時
遇之

海蟾子姓劉名昭遠華山陳搏館之道院與种
放徃來

廣德先生杜光庭處州人仕唐為內供奉避亂
入蜀王氏爵為師臣

尔朱先生偽蜀廣政中飲酒食猪臟渝州刺史
謂其幻惑以竹籠沉之江至夔為漁人所得上昇巖補闕得青金丹方朱桃稚薛稷圖其

形傳於世

呂洞賓謂侯生曰蛇蝎天地猶以自然之氣使
之生以遂性殺此救彼有損無益取紙隱語
三口共一室室畔水偏清乃呂洞賓字

陳希夷先生一睡或半歲或三數月近亦不下
月餘留藏真息飲納玉液吾睡真睡也魯與
毛女游

鯉魚大小並三十六鱗

蝟能跳入虎耳中見鵲便自仰腹受啄
水蛭亦如魚子經三年得冷水活

蛇蛻塞兩耳治瘡疾覆溢子是蕪子採取汁合
成膏塗髮不白麀鹿非八卦辰屬不葷臙能
溫補於人生死無尤道家聽用為脯
天寶中河南緱氏縣太子陵仙鶴觀每年九月
三日夜有道士一人得仙已有舊例至日具
姓名申府張竭忠為令不之信陰令二勇士
執兵覘之至三更有一黑虎入觀來銜一道
士射之不中棄道士而去令於是申府請
矢大獵石穴中格殺數虎或金簡玉錄冠帔
髮骨甚多其觀遂廢為陵使之居

晉之康中梁國女子許嫁而夫成經年不歸女
家更強以適人尋病凶夫還問安所在夫徑
至墓開棺女遂活因與俱歸後壻聞知詣官
爭之王導曰此非常事不可以常理斷之宜
還前夫

惠帝世杜錫家葬婢誤不得出後十年開冢祔
葬而婢尚生初婢之埋年十五六及開冢更
生猶十五六嫁之有子
太和中有關周世家得殉葬女子數日而有氣
數日而能言郭太后慶養之又太原人破棺

得一生婦人視其墓木可三十歲
南方水癡其大如槩類鼻涕聞人氣則閃閃而
動墮人體成瘡以射香朱砂塗之愈

續博物志卷第二

續博物志卷第三

前都官員外郎隴西李石撰

禹長九尺九寸湯長九尺孔子長十尺文王長
十尺伍子胥長一丈眉間一尺韓王信八尺
九寸金日磾八尺二寸東方朔九尺三寸王
莽時奇士巨毋霸長一丈六尺圍本出於蓬
萊魏咸熙太人見襄武長二丈脚跡三尺二
寸符健皇始四年有長人身長五丈是月霖
雨河渭泛溢中流得木屐一隻長七尺三寸
屐指長尺餘

漢武故事東郡送一短人長七寸曰巨靈光武
時潁川張仲師長二寸東方朔曰西北荒中
有小人長七寸朱衣玄冠鶴國男女皆長七
寸海鵠吞之腹中不死

子華子曰黃帝之治天下也其精殺之感蕩上
沉而下浮為百福之聚是百神受職於庚也
帝乃採銅煉剛質也登彼首山就高明也作
大鑪者鼓陽代神鼎者熟物之器也上水而
下火二氣升降以相濟中和之氣也群龍者
衆陽之氣雲者龍屬也帝鄉者靈臺之闕而

心術之變也弓裘衣冠者帝之所以善世教
俗之具也甚矣世之好恠也後世必有人主
好高而慕天以久生輕舉為羨慕者左右狡
詐希寵之臣又從而逢之是將壞心於黃帝
之所造也

玉局觀洞高駢帥蜀取罪人以繩絆其腰令探
淺深繩兩白方絕出青城山洞夫觀門
巫山道士黃萬護以符藥救久蜀王建名之鋪
草席水面泝流而上一日至成都省郎曹圖
鄙其人

李德裕好餌雄朱有道士自云李終南笑曰此
 是世間凡火服之反促壽因出一玉象子狀
 如拳曰此可求勾漏瑩澈者燃香致象鼻下
 勿令婦人雞犬見之三五日象自服之即復
 吐出乃可服此火玉太陽之精凝結已三萬
 年以相公好道因以奉借唯忠孝是念無自
 貽咎又出金象云此是雌者貴其相伴不示
 玉象飛去德裕服之有異乃於都下探聘名
 姝至百數不止象不復吐後南遷再遇道
 士怒甚索一象是夕風雨濤瀨并作玉象如

團火飛出船德裕死於朱崖

顏真卿遇道人陶八八授以碧霞丹餌之曰七
 十上有厄如有即吉後為盧祀所陷縊死希
 烈敗返葬狀貌如生徧身金色爪甲出手背
 鬚髮皆長數尺人咸異之後有商人過之於
 羅浮山寄書至偃師顏氏守瑩者曰此先太
 師親翰書法蠶頭馬尾真得仙也

唐武宗四年官市郎巾有疑為狼筋者有老僧
 云貧道昔曾以一子於賈胡市得二枚狀如
 巨蝻兩頭光帶黃色淫帥段祐宅失銀器十

餘集奴婢環庭多之虫慄動有一女奴臉脣
瞬動乃竊器者

返魂香東方朔曰月氏國使者獻香曰東風入
律百旬不休青雲于呂連月不散意中國將
有好道之君故搜奇蘊異而貢神香乘沈牛
以濟弱淵策驥足以度流沙今十三年矣香
能起天殘之死疾下生之神藥也疾疫大死
者將能起之以薰牙及聞氣者即活明日失
使者所在後元元年長安疫死者大半帝分
香燒之死未三日皆活芳氣三月不散餘香

一旦失亡

涼土異物志葱嶺水分流東西西入大海東為
河源禹所言崑崙蓋本河所出也潛發于蒲
昌浴書所紀出於重野經積石為中國河也
張騫但能至大苑見河水初示達其潛發處
桑欽水經云崑崙在河水西北去嵩高五萬
里其高萬一千里鄴道元云崑崙之山三級
下曰樊桐一曰板松中曰玄圃一名閼風上
曰層城一名天庭是謂大帝之居十三州志
云山去北海岸十三萬里有弱水周匝東南

接積石高誘曰河出崑山伏流地中萬三千里禹導而通云以出積石山海經乃云自崑崙至積石一千七百四十里又曰西海之南流沙之濱赤水之後黑水之前有大山曰崑崙又曰鍾山西六百里有崑崙周穆王崑崙瑤池去周之溼澗特萬有一千一百里西王母告穆王云去咸陽乃三十六萬里東方朔十洲記方丈在東海之中央群仙所治為崑崙山有三角曰閻風曰玄圃曰崑崙宮張華所叙崑崙銅柱為天柱蓋本方朔神異經也

釋氏西域志阿耨達山上有大淵水宮殿樓觀甚大即崑崙山穆天子所至即阿耨達宮也西為新頭河為天竺諸國皆度葱嶺郭璞曰似別有小崑崙

李暉虞部該聞錄所取神仙七人尔朱先生朱真人桃稚神和子屈突無為海蟾子劉昭遠榮隱先生火井縣許山人漢杜光庭

龍腦香段成式云出波律國樹高八九丈可六七尺圍乾脂為香清脂為膏子主內外障眼又有蒼龍腦不可點眼經火為熟龍腦

香譜云麝以一子真香糝作三四子刮取血膜
雜以餘糝皮毛不辨也麝香有二色蕃香蠻
香又雜以黎人撰作官市動至數千計何以
塞科取之責所謂真有三說鹿群行山中自
然有麝氣不見其形為真香入春以脚剔入
水泥中藏之不使人見為真香殺之取其膻
一鹿一膻為真香此余所目擊也
仁善盛明曰舜殘民多豐曰桀殘義損善曰紂
慈惠愛親曰孝愛民好與曰惠聖善周文曰
宣聲聞宣遠曰昭克定禍亂曰武聰明睿知

曰獻溫柔性善曰懿布德執義曰穆仁義說
民曰元安綱治紀曰平亂而不損曰靈保民
耆艾曰明辟土有德曰襄貞心大度曰匡太
慮慈民曰定既過能正曰恭不匡其國曰聲
一德不辭曰簡夙興夜寐曰敬清白自守曰
貞柔德好聚曰靖安樂治民曰康小民畏忌
曰億中身早折曰悼慈仁和民曰傾好勇致
力曰莊恭仁短折曰哀佐國逢難曰愍名實
過爽曰繆雍遏不通曰幽暴虐無親曰厲致
志士圖曰景辟土兼國曰桓經緯天地曰文

執義揚善曰檉短折不成曰殤去禮遠衆曰
殤忌政外交曰攜治典不敷曰震

大學同官有曾官廣中者云沉香雜木也朽蠹
浸沙水歲久得之如倍崖海道居民橋梁皆
香材如海桂橘柚之木沈於水多年得之為
沉水香本草謂為似橘是矣然生採之即不
香也

海藥本草云降真香主天行時氣燒之或引鶴
降

雀頭香即香附子

倉頡解詁云芸蒿似邪蒿可食魚豢典略云芸
香辟紙魚蠹故藏書臺稱芸臺

南唐女冠耿先生烏爪玉貌獲寵於元宗將誕
之夕震雷繞室大雨河傾半夜雷止耿身不
復孕太食國進龍腦油上所秘惜先生見之
曰此非佳者當為大家致之乃縫夾絹囊貯
白龍腦一斤垂於棟上以胡餅盛之有頃如
注上駭嘆不已命酒泛之味逾於太食國進
者又於元宗前搗雪為銀錠投紅爐淬之成
中金指痕猶在又取宮妓其中糞壤炒為銀

開寶末內庫尚有先生糞銀炒小麥於銀釜
成真珠

禹治水土至北海之北有國曰終北國之中有
山名壺領狀若甌瓠項有口狀若負環名
曰滋穴有水湧出名曰神漢其過椒蘭味逾
醪醴一源分為四埒注於山下民飲於神漢
浴於神漢此列子寓言也

泥壁未乾揮涕其上陰雨中化為蟲狀如蚓
東方介氏之國其國人數知解音聲之語者蓋
偏知之所得太古神聖之人備知萬物情態

悉解異類音聲會而訓之言血氣不相殊也
條支國臨西海出師子大雀郭義恭廣志曰大
雀頸及身臂蹄都似橐駝舉頭高八九尺張
翅丈余食大麥其卵如甕今之駝鳥也漢元
帝時有大鳥如馬駒時人謂之爰居

環主國野象一牡管三十余牝牝者牙纒二尺
迭供牲者水草卧則環守牡象死共埋之號
吼其處乃散

鼈為臠數食可長鬚
鯨魚心肝及頭毒如野葛

蝥蟬大者力能與虎鬪取之不戒螫能剪殺人
鬻皮殼甚銳然性畏蚊蚊小螫之輒斃燕山錄
曰煮羊以鼈者鼈以蚊物有相感鶉鴝飲水
數升而不足鱸鮪入口若露而死猿有手可
以捕鼠而制於鼠鹿有角可以觸矢而制於
犬

續博物志卷第三

續博物志卷第四

前都官員外郎隴西李石撰

燧人四佐明由曉升級整必有受稅俗賦也成博

受古諸壘隕丘受延嬉錄也

伏犧六佐金提主化俗昆鳥明主建福利也視默

主灾惡害也紀通為中職內也仲起為海陸主也陽

侯為江海水也

黃帝七輔風后受金法天老受天籙五聖受道
級知命受糾俗窺紀受變復地典受州絡力
墨受淮斥力墨作力

陶淵明云事見論語摘輔象孔長彥孔季彥兄弟聚徒數百故時人為之語曰魯國孔氏好讀經兄弟講誦皆可聽學士來者有聲名不

過孔氏那得成

孔子生鯉字伯魚鯉生伋字子思伋生白字子上白生求字子家求生箕字子京箕生穿字

子高穿生子順相魏自叔梁紇至子順九世

魏城大梁

毛蟲之精曰麟羽蟲之精曰鳳介蟲之精曰龜

鱗蟲之精曰龍裸蟲之精曰聖人

劉向校勘以來子歆為七略大凡九萬三千二百六十九卷王莽焚燒之後王允收而西者僅七十餘乘道遠復棄其半荀勗分經史子集為四部大凡九千九百四十五卷西晉李允以勗舊部校之在者三千一十四卷宋謝靈運造四部目凡四千五百八十二卷王儉造目錄萬五千七十四卷齊主亮造書目萬八千一十卷梁任昉文德殿所藏二萬三千一百六卷元帝克平侯景收文德殿書歸江陵凡十餘萬卷周師焚之宋武所收四千卷後

周書自八千增至萬卷周武平齊僅至五千
卷唐滅隋魏鄭公盡收圖書載以船經砥柱
沒于之七八大凡八萬六千九百六十六卷
見在三萬六千七百八卷開元中四部目錄
凡五萬一千八百五十二卷

自秦同書文丞相斯作倉頡篇中車府令高作
爰歷篇太史敬作博學篇文園令相如作凡
將篇黃門令游作急就篇皆書文之林苑欲
識字者不可不知惜哉凡將已亡不可復見
急就章存焉西京文氣亦可見矣顏籀注此

書嘗得皇象鍾繇衛夫人王會稽等篇世所
傳唯張芝索靖二家為真章草書芝有鳳爵
鴻鵠等數行靖所書乃三之二自母縛而下
闕七百五十字

前輩云於字必字无草書

宋袁淑文廬山公九錫文荷橐致餐尔之功音
隨時興尔之智用不應時尔之鳴長頰廣額
脩尾後垂尔之能是用遣中大夫間丘廬加
尔使御大鴻臚班脚木將軍以楊州之廬江
吉之廬陵吳之桐廬封尔為廬中公大蘭王

凡錫文太亥十年乙亥朔十三日丁亥燕伯
使者豪姝冊命大蘭王曰咨資養於人主
雖无爵而有秩君之純封國承氏君之美白蹟
彰於周詩涉波應乎隆象君之德長驅直突
陣无全鋒君之勇

宣父因禱尼山得名丘字仲尼子名鯉字伯魚
史鮪亦字子魚再耕字伯牛如鬪穀於菟之
類黑鬻柞臼之類甚多

宋齊丘乃字超回不自量如此孟軻莊周其字
不傳或云軻字子輿周字子休皆後人以意

取之耳

東漢無復名或云王莽之禁俗襲所致
不可為耳如是為爾而已為耳之乎為諸西域
二合之音切字之原也

絳州碧落觀天尊像高丈餘唐龍朔中刺史李
湛為母氏太妃追薦所造上有篆文老黃冠
云李史君高宗之子有二道士求篆此文閉
為篆畢化為二白鶴飛去餘一及字欠一畫
李陽冰於此學篆凡十二年終不得其妙
明皇獲二十七山玉像於寧州羅川縣金華洞

奇偉異狀各各不同內有心星一坐甚美手
板復有明致御名其地屬互可思狂其人已
百歲後置真寧觀改羅川為真寧縣今有玉
象圖傳於世

元末肅宗獲十三寶於楚州改元寶應

天寶中大宛進汗血馬六匹一曰紅叱撥二曰
紫叱撥三曰青叱撥四曰黃叱撥五曰丁香
叱撥六曰桃花叱撥上乃製名曰紅輦曰紫
玉輦曰平山輦曰凌雲輦曰飛香輦曰百花
輦後幸蜀以平山凌雲為識西京雜記漢文

自代還有良馬九匹皆天下駿也一浮雲二
赤電三絕群四逸驃五紫驚六綠驪七龍子
八麟駒九絕塵號九逸

易林曰巽為雞雞鳴節時家樂無憂

皇覽曰蚩尤冢在東郡壽張縣關鄉城中高七
尺常十月祠之有赤氣出如絳名為蚩尤旗
穀城西流泉西北入青水城西北三里有項羽
冢石碣猶存題云項王之墓皇覽謂去縣十
五里謬也彭城穀陽城西南又有項羽塚水
經謂為非魯為楚守漢王以羽首示魯乃降

遂以魯公禮葬於穀城以穀陽城穀城二塚得非身首異處乎皇覽曰山陽鉅澤縣有有髀塚黃帝殺蚩尤身首異處故別葬亦二塚也

濟水東北灤水出焉灤水出歷縣舊水涌若輪齊侯會于灤是也有舜妃廟對山有舜祠舜井舜耕歷山亦云在此蒲坂縣西有歷觀舜西耕歷山有舜井為汭二水山上有舜廟周虞風土記曰舜葬上虞耕處即始寧剡二縣山下多柰木吳越之間名柰為櫪故曰歷山二

說一以灤為歷一以櫪為歷未知孰是皆屬道元說

牧靡縣因草得名生牧靡可以解毒鳥多誤食鳥喙口中毒必急飛往牧靡山喙牧靡以解毒

馬出越睽之西若黑紐莎縻之粉米飲之七歲可御日馳數百里

東觀漢記王阜為益州太守神馬四出滇河中魏末有神馬夜過官牧迹大如斗入河水中真誥金陵古名之為伏龍之地句曲山秦時為

句金之處以積金山得名山生黃金漢靈帝
詔採句曲之金以充武庫孫權遣宿衛人採
金此伏龍之地因改名金陵陶洪景云大茅
山尚有數坑名金井山之近東諸處碎石往往
往皆有金砂真誥又云水色白都不學道飲
此水亦令人壽亦金津液之所經耶

岡山有穴通大句曲山有石腦在方山下石腦
故如石但小斑色而軟形狀圓小如魯色似
鍾乳李整昔有風疾先多房事服此乃愈
豫章城南門曰松楊門門內有樟高七丈五尺

大二十五圍垂陰數畝漢官儀曰豫章郡樹
生庭中因以為名

劉歆云湖漢等九水入彭蠡因言九江

沫水出廣柔徼外有石紐鄉禹所至也

沫水自蒙山至南安涸崖水脉漂疾歷代為患
蜀守李冰發卒鑿平涸崖河神鼻怒冰操刀
入水與神鬪遂平涸崖

續博物志卷第四

[Faint bleed-through text from the reverse side of the page]

續博物志卷第五

前都官員外郎隴西李石撰

女媧之功烈上際九天夫下契黃墟名聲被後世

光輝重萬物乘雷車服應龍駮青虬席蘿圖

震黃璐接絕瑞前白螭後奔蛇

項浚始學篇曰天地有天皇十三頭洞冥記曰

一姓十三人徐整曆紀曰歲紀攝提元氣肇

有神靈一人有十三頭始學篇曰人皇九頭

兄弟九人九州各居其一

夷者觝也其類九畎夷千夷方夷黃夷白夷赤

夷玄夷風夷蠻者慢也其類八。天竺咳首焦
僥跛踵穿曾僂耳狗軌旁春戎者兇也其類
六。僥夷戎央老白耆羗鼻息天剛狄者辟也
其類五。月氏絨貊匈奴單于白屋

蜀蠻邛部川都王蒙備死氣未絕其妻子以錦
數疋相續繫死者曳之於地置十數里外高
山上令氣絕乃復以錦被裹而埋之會其族
哭之名作鬼親字近州蠻人說其事倭辰余
國或橫書或左書或結繩或鏤木唯高麗摹
寫頽法取正中華

以清水嗽口飲酒至斗不亂或曰酒毒自齒入
也

南人好飲茶孫皓以茶興章昭代酒謝安詣陸
納設茶果而已北人初不識開元中太山靈
巖寺有降魔師教禪者以不寐人多作茶飲
因以成俗

楚人陸鴻漸為茶論并煎灰之法造茶具二十
四事以都統龍貯之常伯熊者因廣鴻漸之
法伯熊飲茶過度遂患風氣或云北人未有
茶多黃病後飲病多腰疾偏死

唐則天於東都造明堂高三百尺九州鼎置明堂之下當中豫州鼎高一丈八尺受一千八百石餘各依方面高一丈四尺受一千二百石都用銅五十六萬七百一十二斤禹治洪水觀於河見白面長人魚身出曰吾河精也授禹河圖而返於淵又曰堯修河洛有五老相謂河圖將來告帝以期知我者重瞳也五老乃翻為流星而升于昴山東風俗遇正月取五姓女年十餘歲共卧一榻覆之以衾以箕扇之良久如夢寐或欲刺

文綉事筆硯理管絃俄頃乃寤謂之扇天卜以乞巧

衡山五嶽之南嶽也黃帝以潛霍為山之副尔雅云霍山為南嶽至漢武以衡山道遠徙祭于房江潛山或曰衡山即霍山山海經衡山即岫嶠山常山者陰終陽始其道長久故北山曰常山山亦恒其山五穀四種五穫一勝梁米以純苦酒一斗漬之三日出百蒸百暴遠行一食十日不飢重食四百九十日不飢又方米一斗赤石脂三升水漬之二三日

搗為圓如李大可辟穀

靈寶五符經用白鮮米九蒸九暴

庚桑名楚史記作尤桑

夏棘字子棘為湯大夫列子作夏革

月令曰椒是玉衡星精服之身輕能老桓是仙

藥又云進酒次第當從小起以年少者起先

燃草爆竹起於庭燎

正月望祭門先以楊枝插門隨楊枝所指以酒

脯飲食及豆粥捕節祭之

酒杯藤出西域藤大如臂葉似葛花實如梧桐

花堅可以酌酒有文章映徹可愛實大如指
如豆蔻香美銷酒來至藤下摘花酌酒仍以
其實醒酒國人寶之不傳中土張騫使大宛
得之出張騫出關志

菊花舒時採莖葉雜黍米釀之至來年九月九
日始熟謂之菊花酒

孟詵云葡萄不問土地但收之釀酒皆得美好
昔有於王敦城下得一銅鉦中間鑄一物如羊
頭其身如篆文乃飛廉也

倉頡本鳥迹為字取其孳乳相生故有六義秦

用篆文燒書古文遂絕或曰大篆出周宣王
史籀小篆出秦李斯及胡毋敬又曰古隸之
書起於秦省篆為隸以便文行劇務以明隸
者篆之捷也或曰程邈於雲陽增損或云臨
淄人發古塚得銅棺前和外隱為隸字言齊
太公世孫胡公之棺唯三字是古隸證知隸
自古非始於秦或曰秦人王次仲變倉頡舊
文為今隸文始皇奇而名之三徵不至秦櫺
車殺之次仲化為大鳥飛去落三翻於山
有大翻小翻之名

彭城縣古彭祖之國也世本曰陸終之子其三
曰錢是為彭祖下曰彭祖塚彭祖長年八百
綿壽永世而亦有塚者蓋亦元極之化
蒲坂西舜所都有姓劉名陸採楫河流醞成芳
酎食同祐枝之年排於桑落之辰故酒得其
名方士之貢最為佳酌每云索郎有顧思同
旅語索郎反語為桑落也

海中有庭朔山上有桃木蟠屈三千里枝東北
鬼門萬鬼所出入也秦興鬱壘居其門執葦
索以食鬼故十有二月歲竟臘之夜遂以茶

壘并樹葦索於門

王充云會稽本山名夏禹巡狩會計於此遂以名郡或曰此非五嶽禹時吳裸斷髮文身無會計事

董生春秋繁露曰春旱以甲乙日為蒼龍長一丈八尺居中央為小龍七各長四尺於東方皆東向其間相去八尺小童八人齋三日服青衣而舞之下三時准此皆燔椎雞燒豕猪尾於里北門及市中以祈焉

蜥蜴求雨法以土實巨甕作木蜥蜴小童搥青

竹衣青衣以舞歌曰蜥蜴蜥蜴興雲吐霧雨若滂沱放汝歸去

交州安陽王有神人名臯通為安陽王治弩一

張一發殺三百人今之所謂石九十二斤法為淮漢秤三百四十一斤也今之蹶弩九石古之二十五石北魏武率二人之力挽弓三石古之三十四鈞北顏高之弓當五人餘

續博物志卷第五

Faint vertical text columns within a rectangular border, likely bleed-through from the reverse side of the page.



